

## Korporata Sfida e Mijëvjeçarit (KSM)

Për Shpërndarje të Menjëhershme  
3 prill 2006

Kontakt: Davy Kong/(202) 521-3864  
[www.mcc.gov](http://www.mcc.gov)

### Njoftim për Shtyp

#### Shqipëria Nënshkruan Programin e Pragut të Korporatës Sfida e Mijëvjeçarit për të Luftuar Korruptionin

Tiranë, Shqipëri – Sot, Drejtori Ekzekutiv i Korporatës Sfida e Mijëvjeçarit (KSM), Ambasadori Xhon Daniloviç mori pjesë në nënshkrimin e një programi Pragu prej 13.85 milionë dollarë për Shqipërinë në Ndërtesën e Këshillit të Ministrave në Tiranë. Ministri Shqiptar i Financave Ridvan Bode dhe Drejtori i Misionit të USAID Herri Birnhole nënshkruan marrëveshjen. Kryeministri Shqiptar Sali Berisha dhe Ambasadorja e Shteteve të Bashkuara në Shqipëri Marsi Ris ndoqën nënshkrimin. Programi përqëndrohet tek përmirësimi i rezultateve të vendit në treguesit e Qeverisjes së Drejtë dhe Lirisë Ekonomike të KSM dhe synon të ulë korruptionin nëpërmjet reformave në administrimin e tatimeve, prokurimin publik dhe regjistrimin e biznesit.

**“Përgëzime popullit dhe qeverisë së Shqipërisë për përkushtimin e tyre të guximshëm për të luftuar korruptionin dhe forcuar sundimin e ligjit.”** - tha Drejtori Ekzekutiv i KSM, Ambasadori Xhon Daniloviç. **“Ky program është një manifestim i përkushtimit së Shqipërisë për të përmirësuar infrastrukturën e duhur institucionale që nevojitet për të ulur varférinë dhe për të nxitur rritje të qëndrueshme ekonomike. Falenderojmë Ambasadoren Ris për udhëheqjen e saj, sikurse edhe kolegët tanë të Ambasadës së SH.B.A. dhe të Misionit të USAID në Shqipëri për ndihmën e tyre për ta bërë këtë program një realitet.”**

Programi i Pragut i KSM është ndërtuar për të ndihmuar vendet që janë në "prag" të kualifikimit për Kompaktet e Llogarisë Sfida e Mijëvjeçarit (LSM) dhe që janë të përkushtuara ndaj reformave të politikave që përmirësojnë rezultatet e tyre të nevojshme për t'u kualifikuar për asistencë nga Kompaktet e LSM. KSM mat politikat në tri fusha – Qeverisja e Drejtë, Investimi në Njerëz dhe Nxitja e Lirisë Ekonomike – duke përdorur 16 tregues politikash që kanë lidhje të provuar me uljen e varférisë dhe rritje ekonomike. Asistenca e Programit të Pragut jepet për të ndihmuar vende të tilla që të trajtojnë dobësitë specifike të politikave, të cilat tregohen nga rezultatet e vendit në treguesit e politikave që kanë rëndësi kyçë për kriteret dhe metodologjinë e kualifikimit për Kompaktet e LSM.

Deri më sot, KSM ka miratuar afro 100 milionë dollarë në kuadrin e Programit të Pragut, përfshi 35 milionë dollarë për të luftuar korruptionin në Paraguaj, 13 milionë dollarë për të ndihmuar shkollimin parësor për vajza në Burkina Faso, 21 milionë dollarë për të ndihmuar popullin në Malaui të luftojë korruptionin, si dhe 11 milionë dollarë për të ndihmuar popullin e Tanzanisë të luftojë korruptionin dhe të forcojë sundimin e ligjit.

Gjithashtu, KSM ka nënshkruar Kompakte që arrijnë një total prej 1.5 miliardë dollarë me tetë vende: Madagasgar, Kepi Jeshil, Honduras, Nikaragua, Gjeorgji, Vanuatu, Benin dhe Armeni.

KSM gjithashtu po angazhohet në mënyrë aktive me vende të tjera me të drejtë aplikimi për t'i ndihmuar për zhvillimin e Kompakteve.

###

*Korporata Sfida e Mijëvjeçarit (KSM), një korporatë e qeverisë së Sh.B.A. ndërtuar për të punuar me disa prej vendeve më të varfra në botë, bazohet mbi parimin që ndihma është më e efektshme kur përforcon qeverisjen e mirë, lirinë ekonomike e investimet në njerëz që promovojnë rritje ekonomike dhe eliminimin e varfërisë së skajshme.*

**Bashkëngjitur është një faqe të dhënash që ofron hollësi të mëtejshme mbi programin e Pragut të Shqipërisë.**